

千頃齋初集

千頃齋初集卷之二十

汝南黃居中明立父著

文部

祭文

祭黃學士老師

嗚呼扶輿間氣五百昌期孕靈毓秀以篤吾師
師產南服金相玉姿初登越解載魁禮闈入叅
史局兼掌制詞繙經虎幄簪筆鳳池南宮簡
試顓俊揆奇庚典閩棘亦衡帝畿參苓洩渤

收羅靡遺秩晉宮詹篆視北扉爰立伊邇物望
攸歸奇服誨忌貝錦傾危含沙射影蟻聚蠅飛
師曰腐鼠嚇我胡爲懷恩賜告金綺駟駢掛
神武冠焚學士魚考繁邁軸衡泌棲遲一丘一
壑自謂過之鴻冥寥廓矰繳安施葆光十載讀
禮再期驥心猶壯鷄骨不支歲星東躔白日西
馳位不配望年甫及耆朝嗟柱石鄉惜羽儀
掩鐸絕涸醪涕纏悲某等孤生謬愿甄推受知
不淺報德猶微在昔讒詬高張翕訛吹聲逐臭

構阱設機亡能剖心以明素絲徒虛國士慙負
恩私翳師白志百涅不緇人乎難必天則已知
蓋棺論定誰躋誰夷師已弄丸由由怡怡翳師
有子克紹弓箕伯叅齊藩仲奮董帷策足天衢
連翩雲遶聞孫鬱起文采陸離師覩象賢或藉
解願某悼吾師如喪嚴慈峰頽木壞吾黨安依
所恃神理德音不違不朽者言文其在茲侯芭
守玄竊附於斯登徒九辨庶以明師嗚呼哀哉
尚饗

祭前沈丘令淮陰劉師

嗚呼黃河北帶大江南
滙中爲長淮藏珠韞貝
乃篤吾師金相玉姿丹鉛丘索赤幟文詞遂擁
臯比都講槐市弓冶嗣芳衿紳趾美師應明經
子仍策名曲臺家業儼焉世程畿闡一薦明廷
三獻蹶躅敝袍終蹶文戰初筮英鐸士衿桀黠
庚綰趙符俗振頽薄沈州之政甘棠載咏留犢
如時還珠比孟維沈游饑出滯蘇疲躬翼窮櫬
瘞藥殍糜歲以無害盜亦相戒惠罔拊嬰威行

拔薤戶歌巷僂以方卓魯師遽引年翻然解組
有田可畬有溪可漁一丘一壑左圖右書二三
令子席師福履宦學蜚聲後先蔚起不謂長君
而遽修文師以是慟立骨銷魂猶憑几杖起居
亡恙歲祝莊椿八千而上胡不憖遺溘爾大歸
山頽木壞吾黨疇依在昔閩棘掄材是職辱師
甄收不棄樗櫟狗知感恩永託師門羈紲守官
久缺間存寤言長歎訃音一旦暮已宿草燧亦
改鑽旣怛且疑緼涕纏悲爲位哭師如初歿時

千里重趼生芻不腴何以哀師登徒九辨嗚呼
哀哉尚饗

祭故南京太常少卿王麟翁老師

嗚呼吾師去閩歲二十兮閩士思師如一日兮
吾師游岱歲十七兮閩士思師如初失兮昔拜
闕命士方待棘維師受事累月而畢續紛閩
士其麗不億維師衡文一目別識滅沒存亡相
機辨色秦鏡照人心膽靡匿八月都試多士雲
集日奏萬牘遴校一夕得八十八其四獲薦余

小子居謬叨後殿維居數奇久阨郡縣亦有兄
良屢蹶文戰並辱甄收褻然上選玉耶石耶一
朝剖見良起諸生六翮高騫旋魁禮闈徊翔木
天再領成均復貳宮詹居困駑駘鞭策弗前蹶
躄公車屈首冷羶驥心未死鷄肋徒憐嗚呼一
升一沉慚負恩私狗知感義捐縻何時忽登師
門如欲問奇音容莫卽醞涕纏悲不朽者言日
星等垂澹圃無恙風流在茲庶幾守玄獲遂皈
依西州一慟薄薦江薜尚饗

祭唐抑所侍郎

聖皇御曆十有四年籲俊尊 帝策士臨軒公
起孤生 大廷首對鼎甲蜚英卿雲薦瑞維公
文章金相玉映簪筆代言陸離彪炳木天視草
承明直廬持衡棘院典制石渠承華置傳蚤擢
宮端旣長詞林復貳春官出蒐材館入講經幃
望隆公輔陪簡 綸扉乃教庶常乃推統均聽
履側席 帝眷方殷胡天不憖歲在龍蛇金甌
待卜玉匣興嗟 帝念儒臣 講幄特恩 龍

章煒燁以懃忠魂爰加贈秩更議易名几筵窻
窆生歿哀榮致命遂志公已獲考矧多哲胤家
駒國寶公亦何求軫在社稷慘我冠紳棟撓是
盡言念伯氏附公同籍小子登龍歡逾夙昔忽
耳訃音幾爲於邑九原可贖百身曷恤絮釀臙
肉敢告霽輿公神行天爲我躊躇嗚呼尚饗

又

代曹總河

九峯毓秀三泖滙霽挺生名碩隆棟

王廷

皇帝臨軒擢公上第首唱臚傳五雲日麗乃紬

金匱乃綰玉堂綸宣兩制史擅三長掄材瑣院
編摩東觀藻鑑澄鮮詞翰璀璨 帝念儲訓蚤
闢銅龍橫經 鶴禁翼善 春宮爰進端尹爰
貳常伯禮闈籲俊得士三百師表庶常視篆北
扉嘉謨啟沃揆席首推 帝方夢弼公乃騎箕
歆雨忽霓欲揖罔維 朝紳共悼 聖恩加恤
顯錫殊稱永光窀穸嗚呼陸有時洋湖有時桑
生榮死哀公也不亡維公壯猶厥施未究無涯
者知難必者壽某昔建纛三吳獲遂瞻依一朝

感逝千古纏悲素旒南邁掘趨靡及醕醑陳詞
臨風於邑尚饗

祭甘紫庭開府

代周撫院

大龍挺秀章貢滙流天開霽閔地產琳球祥鍾
名碩蔚爲國禎金相玉質嶽峙淵渟兩令巖邑
鸞集雉馴四郊杲日比屋陽春 楓宸特簡展
采臺端駉駉驄馬嶽嶽豸冠始巡荆楚載按吳
閩攬槍夜隕魍魎晝藏歲逢大弊佐計持衡有
執無異矢公矢明旋遷棘寺左右士師引經察

麗弼成裴燹 帝曰俞哉允文且武俾爾中都
建牙開府中更讀禮牘滿公車越人得歲獲借
旌旗睠茲水國屏翳不仁土田甌脫魚鱉與鄰
公拜自靖爲民請命疏賑疏蠲以澤萬姓起骨
加肉吹律噓枯餐公粥公環戶驩呼願留我公
活此溝瘠胡甫被 新綸而遽丁斯厄慶閭吊
門奄忽倚伏羣夢畢奏百身曷贖某叨梓里復
忝同寅聯鑣柏院遙羽光塵吳越分疆幸依鄰
照爰剔爰撫惟公是肖方藉共舟拯人於溺未

悼者母老孤遺倚閭望斷尸饗者誰亦云慟止
蘭孫玉樹祖武能繩父書不蠹余叨函席與君
周旋左模右楷方慶得賢休沐幾時溘焉鵬集
六館無華諸生雨泣淒風密雪素旄蕭蕭陳詞
擬斐侑以申椒達人大觀修短鳬鶴而况浮名
得失蕉鹿以此告君君視可含空華何戀幻世
何耽尚饗

同寅合奠黃蒙泉教授

學錄正垣父也

於乎豨韋日波民鮮長年而翁鶴算黃髮丹顏

瑟琴靜好或悲斷絃而翁伉儷偕老華顛明經
綺歲毫腐研穿晚克貢籍釋褐寒氈三咏莪樸
模楷森然談鋒嶽嶽腹笥便便絳帷案擁初服
遂還肯戀五斗曳裾梁園尚羊衡泌婆娑圃田
關元守一大道忘筌壽因德劭福以昌全箕裘
奕葉况有象賢鳳苞鵬翮日升霞騫芹宮折鹿
槐市集鱸含飴繞剡蘭玉葱芊一筇里社七豆
賓筵凡翁取世造物所專幾望如月方至如川
履坦而行委順而旋考終羽化何異上仙獨傷

令子陟岵憂懸爲親捧檄奠食大官一命甫逮
三金猶慳封章未錫訃音忽傳 帝予九齡胡
靳一焉西傾東旻大美弗圓子以是慟七尺欲
捐哀號風木永憾終天某於令子鵷列聯翩誼
均弟昆出入比肩一朝分手有涕如泉載拜載
唁寬譬以言海漚石火何物能堅情也罔極命
也弗延教忠移孝子其勉旃君親家國孰後孰
先三旌五鼎亦賁重淵恩榮不朽豈必生前既
慰棘人敢告幽玄吁嗟楚部歲星隕躔呼羗擬

以類集 卷之二
些侑以椒莖
羈蜚蜚
芳鑒此微虔於乎哀哉尚
饗

祭吳封君

大行伯玉父志

三泖溯泐九峯巖辟慶篤延陵秀挺英詰家起
素封世標俠節幽履金貞冲襟玉徹絜仁積行
扶義喜施信孚族里惠卹煢嫠中遭殖落幾困
數奇滿籛非積一經是詒傾橐延師迪成賢胤
朝識棟隆鄉推瑜瑾桂殿飛黃皇華發軔四牡
駢駢寧親省覲
慶典告成移
恩所生
鳳

綸錫寵象服疏榮翁時拜 命御風泠泠七筵

日進几杖時凭庶徼戩穀眉壽亡害豈嬰微恙
遂成積憊冢君徬徨嘗藥灼艾目不交睫衣不
解帶願疏陳情以終養鞠翁曰毋然吾猶恃粥
王事靡盬 君言不宿宜畏 簡書胡久休沐
翁病少間志樂離憂駢駢征夫陟岵遲留或謂
家報翁疾已瘳不如過往再圖歸休留者將父
往者急 君使車朝稅訃音夕聞俛仰慶吊奄
忽在門冢君 陛辭哭踊南奔君南余北不及

嗟憫矯首南天咨嗟涕泗况忝通家獲交一臂
抗顏茲土日侍芳懿一朝大別能亡盡傷薄暎
楚些續招呼羗生芻澗芷侑以椒漿霽連蜚兮
來格洋洋

祭給諫六橋兄

慶源錫羨桂州伊始江都平江奉常大理弓裘
衿紳奕葉蘭芷臬伯縣侯後先蔚起薦生我兄
毓霽開美賢書載登遂躋膺仕製錦宣城豈弟
神明杜母召父言絃宓琴 楓宸特簡瑣闥疏

榮皂囊耀日丹牘曜星何物赤狐構彼青蠅飄
然解組自狎鷗盟文園養寂荆扉匿迹菊松三
徑圖書四壁泛剡曲舟躡東山屐楊權風騷品
題泉石汗竹縹緗流黃紉白陶謝執鞭屈賈遜
席宗黨朋好待而舉火資寄外藏餽糧就褻浚
都干旄填門傾倒擁篲驅前賓筵虛左玄纁安
車胡然弗果隆棟空韜國柱疇荷自營菟裘
自正首丘三素有約九仙同遊白日黯黯青山
悠悠龍潛一壑鶴化千秋嗚呼元龜不作史狐

三才集卷之二十一
誰託壺公峯摧碧溪水涸鄰里罷春守相悲閣
何以哀兄德厚享薄某等或阻龍光或泣鴈行
徒慟西州靡呼山陽着長史塵撫彥先牀嗟乎
子敬人琴俱亡所藉後人世其青氈威鳳文成
俊鶻高騫無涯之智結爲大年運氣有盡神理
綿綿嗚呼哀哉尚饗

會祭伍母黃太孺人

博士際隆母也

時維秋嘗伍母終堂婺星掩曜娥月沉光翳母
有子爲清博士聞訃驚號徒跣奔馳入門泣血

摧慟欲絕杖而後起哭訴嗚咽曰孤自畿拜

命南歸天假之便省覲庭闈母也善病喜恩交
併願乞終養以怡母性母曰無恙老婦恃粥

簡書宜畏 王程不宿孤勉承志戒嬾留侍庶

保餘齡惠徼天庇豈謂浹朞而遽棄兒兒也無
良母獨于罹昔喪孺椿猶恃母存孤繫官守痛
割瞻雲今茲萱折一涯羈縻生不遑將歿不及
訣岵岵深憂風木悠悠季嘆枯魚曾悼椎牛始
爲親需乞匭匭璫囊粟逮親尚媿侏儒養無異

餉况奪之養百身曷贖五內若喪天乎母乎孤
乎人乎一語一涕如不欲蘇吾黨臨視百端開
譬母志云何而乃過悴母出名宗仰德太公子
始通籍亦教之忠受知銓宰國士見待驥足斃
淹鵬溟可逮三載北征振翮一鳴車服膺寵輦
綸馳榮彤管有煒以表內美則百千年其尚無
毀矧母壽祺業臻古稀屬續之辰賢孫焉依誠
信不怠庶幾靡悔子有大孝深悲可改吾黨薦
詞侑以椒卮霽乎不爽珊珊來茲

祭黃泥軒學院太夫人

代兩道

珠出滄淵壁產藍田哲人天挺有開必先於赫
黃氏秀毓睢陽維熊維羆太君發祥猗與太君
蘭儀玉度體坤配乾方娥比婺齊德偕隱以相
夫子俛康而家鬱爲慶始玉成冢器褒然儒宗
人倫麟鳳執苑華崧領解掄魁讀書中秘翱翔
栢府澄清攬轡駉駉馬嶽嶽惠文風生破柱
霜肅埋輪 帝曰嘉哉伊誰式穀 覃恩所生
翟冠象服庶幾純嘏永錫難老以康柱史母榮

懷抱按部西秦持衡南紀畏此簡書寤言陟
屺太君曰嘻恪共乃事雖有離憂適獲我志捧
檄而南日喜加餐驟聞一疾方寸摧酸抗疏陳
情願乞將母稍憫倚閭或微壽耆天胡不遺民
之無祿栢棬忽捐訃音來告柱史含哀擗踊遄
奔單車就道促入里門彼都譽髦戶哭巷走母
去吾師師尚我有師歸不復山斗疇依瞻望靡
及醞涕纏悲某等備職末員辱公覆露義均戚
休能無永慕薄言芟辭侑以沼苙霽連蜷兮聿

來鑒只

祭唐柳所夫人

九峯鬼鬼三泖瀾瀾旣生名碩亦釐女士倚與
宗伯鼎甲蜚聲北扉視篆東觀橫經展也夫人
秉德齊軌淑慎其身以相夫子 青宮勸講鷄

鳴會盈誰歌明爛視夜以興素絲委蛇琴瑟靜
好誰則與偕樂我綦綰人言宗伯爲諸生時下
帷攻苦家園不窺於時夫人紉箴刺繡舉案相
對分更分漏人言宗伯茹藥餐英居官居家不

問治生於時夫人歲蕤筦鑰絲泉蘋蘩靡不躬
瀹禮闈籲俊羣無留良乃貳秩宗乃教庶常赫
赫端尹望重服休夫人佐之或從或留從則襄
謀以贊國政留則主饋以代閭柄 帝制有嘉
曰惟哲妣 鳳誥龍章錫之繁祉一命曰安再
命曰恭翟冠象服 疏恩秩隆猗與宗伯學爲
帝師求形惟肖爰立有期名卿在朝賢媛在室
副禕六珈鼎來可必百年偕老厥懽未央胡厭
華屋而就玄鄉某從伯氏獲耳聽屏抗顏茲土

益諗芳馨言念世雅聞計驚惻更憫諸孤啣哀
增盡薄言酌之澗藻溪毛霽連蜷兮鑒我心慘
祭王洪洲少參元配陳宜人

率律機山汪洋泖水旣產名碩亦釐女士有淑
者媛誕自望胄彤管揚徽璇閨稟秀始笄待年
于歸君子鳬鴈興規旨甘佐髓瑟琴宜室雜佩
酬賓入理絲枲出供蘋蘩人言少參發憤下帷
畋漁百氏家園不窺宜人贊之黷脂丙夜織紉
組紃母問冬夏人言少參案試民牧操比懸魚

愛存留犢宜人贊之委蛇素絲相彼錡金樂我
縞綦綦柱后驄乘五花屈軼指佞獬廌觸邪
維時宜人獨持壺柄主饋秉鑰拮据內政三徙
藩臬閩楚關中武以戡亂文爲士宗維時宜人
淑慎以昭副幃孔嘉輜輶有伉中遭謠詠或廢
或起宜人宴如無愠無喜晚遂初衣之適之軸
宜人偕隱雍雍肅肅門內之治不忒其儀羣子
佐酸諸孫含飴承歡娛綵繞邾稱觴令妻壽母
燕喜一堂宜爾君子適志夷猶書抽二酉業擅

千秋是夫是婦皆天所授黃髮齊年何福不茂
人曰慈慶期願可跨胡不百齡浸假而化素娥
隕曜寶婺埋光何陸不洋何湖不桑維昔小子
昔受一廛茲叨邑鐸熟耳母賢聞訃束芻侑以
楚芟薄言酌之敢告地下尚饗

祭何母馬太孺人

紹興司李士柳母也

鳳生丹穴龍出滄淵物猶如此而矧名賢天挺
名賢孕精儲瑞豈子是祥駉母則類鴛湖之馬
龍浦之何蟬嫣二姓代有鳴珂何母馬姬婉嫕

夙懋秉貞璇閨揚徽中菁伉儷贈公琴瑟鐘鼓
樂我縞綦佐彼錡黼斷織勸學提甕尸饗克相
夫子以亢厥宗夫子俠烈雅游喜施捐珥傾橐
必先笄發夫子義方詩書式穀紉箴刺繡丙夜
課讀顯允伯氏奮迹青雲起家越李嶽嶽惠文
維時太君板輿以蒞亭疑謦枉讞獄必試人言
司李冰凜露濃爰書三刺嘉石一空太君之訓
明弼以寬平反無害怡然加餐人言司李大暢
玄風盟雄虎眈氣接鴻濛太君之訓九熊畫荻

文史三冬圖書四壁司李奏最牘滿公車翟冠
象服竚待鸞書世路波濤人情鬼蜮謠啄朋興
貝錦文織當道憐材百口煎雪卒罹計典量
移簡拙母曰固然骯髒招毀與其迂躬母寧直
已東西惟命何戚何快與爾偕隱歸耕縣上子
舍承歡孫枝繞邾堂北樹萱願言永日濛汜奄
迫風木興悲溘爾朝瀼一疾莫醫司李籲號伊
何我罪勉仕爲親三釜不逮幸而將母獲正首
丘母也考終我又何求余於司李神交宿昔抗

顏海膠益欽芳碩珠沉婺隕怛焉盡哀呼些噉
酌敬告泉臺尚饗

同官公莫顧母王太夫人

於乎慶源錫羨有開必先珠生合浦璧產藍田
猗與太君發祥昭族蘭佩明璫肅雍以穆齊德
夫子室家其宜相彼錡金樂我縞綦雲司聽棘
楚國菱棠 綸褒從爵翟弗輝煌于臬于守還
我初衣鹿門偕隱泌水樂饑有子四人弓裘嗣
美業擅一經教成三徙壘篋迭奏伯也先鞭榜

花首列甲第臚傳

東觀弘文

南宮得士賦

動循陔望懸陴將母來諗休沐

賜俞含飴

娛綵慈顏孔愉

帝簡詞臣留雍振鐸朝擁絳

帷夕侍閨閣維時仲氏聯袂騰驤東歸省覲燕

喜一堂板輿承歡金莖上壽子舍凝和孫枝挺

秀樹護愛日願報春暉庶躋大耄福履永綏胡

然一疾乃困二豎闔舍徬徨盈盈淚雨衣絰不

解目睫不交延醫嘗藥神憤形慄六館諸生合

手共祝祈永母齡以安師育彼蒼不吊竟隕婺

光青鳥遠逝白鳥徊翔於乎滄海桑田何物不
改七袞加四亦既壽豈獨嗟司成揆望方瞻函
席未溫遂寢之苦某等末隸參陪幸依山斗日
奉明師獲聞壽母憶母初度下吏稱觴司成爛
舞色笑洋洋今夕何夕遽悲風木哀感槐市道
嗟巷哭大招不返慘我衿紳嗽詞酌醕敢告露
神尚饗

祭陸平翁大宗伯文

天壽平格重我 熙明爲 朝著蔡爲 國典

刑代登弘正元氣渾淪維公以降孕秀鍾醇學
富五車籍窺二酉奏賦南宮褒然舉首於皇

肅祖籲俊儲英紬書中祕授簡承明史擅三長
綸宣兩制翠幄橫經棘闈校秬乃長成均乃振
文鐸儒術士風藉公渠黻翱翔兩都旋貳銓宰
譽歸水鏡望隆鼎鼐揆席在前急流勇退榮進
恬如用明於晦 帝念舊臣田間特起聽履則
識造郝斯喜職司邦禮秩晉官孤鴻裁椽筆載
續典謨宸眷方殷金甌待卜超然脫屣還我初

服謝傳東山溫公洛社游比赤松堂開綠野一
丘一壑矯矯冥鴻覃精內典悟契參同服食沆
瀣遺形鍊魄玄髮朱顏豈緣金石年躋大耋世
仰達尊 龍章燁燁三錫問存公時拜 命偃
屨循牆旣多受祉亦熾而昌詰胤祠武孝篤陳
情係枝奕葉蘭玉蜚聲五福疇倫百順備邁庶
幾難老莊椿等壽人方望瑞公遽上仙 帝予
九齡僅益七焉衣成缺袵宮成缺隅造物忌盈
萬化歸無居等夙瞻泰岱未遂登龍山頽星隕

仰止無從陳詞醑醑臨風太息生榮死哀豈爲
公惻尚饗

祭唐汾洲分水令文

龍浦孕精機山儲瑞灝氣霽心人鍾其粹代有
名賢世德則類叔季風澆美或變異維公至性
真誠坦遂抱朴煬和內行淳備高文鵲起裒然
擢桂公車十上禮闈屢躋晚試一羶帷擁臯比
立雪坐風願解席避再令目溪勞心撫字德比
鳳鸞政謝鷹鷂悵悵無華反嬰衆忌以直取尤

公亦無累飄然解組韞玉藏器人情所難公乃
獨易居可漱流衣欲製芟埽軌杜門逍遙樂志
況有哲胤秋林樹幟名滿南宮才空北冀天道
張弓責券如寄壽必歸仁大齊豈啻胡不憖遺
成然一寐鄰里輟春知交隕淚余炙龍光長懷
瞻跂況於令子夙敦世誼悲逝感存中心如刺
更嗟令子薦居苦塊春風馬蹄暫淹偕計指日
蟬聯大展厥祕奕奕文孫雲達相繼酌酒陳詞
以寫哀意霽兮蟬蟪歆茲醑觴

祭張受所憲使

九峯挺秀三泖滙霽篤生名碩隆棟 王廷顯
允張公吳淞之彥二酉冥摻七襄錦燦龍驤鳳
舉翱翔省郎詰戎振武粉署輝光 帝曰嘉哉
夏曹之冠三楚于宣百城是監再更藩臬所至
咨諏恩流滇服化孚魯鄒逮長臺綱執法平刑
猾吏凜威葑屋稱明明如水月威乃秋霜民隱
洞悉國紀宣揚天衢正亨衝飈忽妬鍛弱清時
懸車中路閉關却埽寄傲林泉棲衡樂泌可以

盡年居取容膝門絕改觀塵營外屏神氣內完
守令師之曰鄉先生里有惇史國有老更人曰
黃耆大齊可跨胡不期願浸假而化嗚呼滄海
桑田何物不改年望九秩亦旣壽豈況有聞孫
擢桂蟬聯家聲能世祖德永延某叨世講仰止
景行頽山菱哲五內悸驚薄言酌之澗藻溪毛
翁霽不昧鑒我心懃

祭方伯林象川公

嗚呼歲在龍蛇哲人菱清溝水澗紫帽峯頽黃

耆彫謝天不憖遺以公之觀察人人憚公之嚴
如秋霜烈日而猶不能無係情于去思以公之
旬宣人人飲公之德如和風甘澍而猶不能無
咨嗟于來遲當公之一歲三遷也人人惜用公
之晚而以爲未究于施及公之一麾以去也人
人意公之未衰而猶或冀其量移迨于今則公
竟中廢而當道莫推望公者不可知而思公者
無窮期蓋公之貞不絕俗直不傷時志不矯激
而近名行不俛仰而畏譏坦衷洞裏信於士大

夫而猶見嗤于詭隨正氣勁節謳吟於田畯牧
豎而或取忌于儕夷乃其恬淡寧泊終始無虧
忠信孚尹閭室不欺天下或有所不及窺而意
公之獨知嗚呼公之存也爲鄉國之元龜爲薦
紳之羽儀公之歿也祭於社爲鄉先生血食於
名宦爲赤子之瞻依神理綿綿德音不違此天
下之公慟而吾儕之所共悲鍾情我輩感念亡
兒以公而猶未能脫然於斯也或公之遺憾吾
儕小人何足以知之嗚呼哀哉尚饗

祭周懷白憲副

代

嗚呼公昔游黌同餽諸生名附龍尾齒則鴈行
臭味莫逆婚媾是盟親稱肺附誼埒弟兄某仍
後殿公已先鳴彤墀奏第粉署蜚英于守于臬
所至同聲芾棠秀麥茹蘖餐冰某也鹿鹿老困
明經一蘊落拓龍蠖沉升公憐舊雅把臂忘形
我肘我腋肝膽盡傾某拜南命公亦西征音容
契闊再易周星溘焉聞訃我心怦怦是耶非耶
喪我良朋如舟亡柁如輿失衡我子公女誰倚

誰憑嗚呼公之器宇嶽峙淵渟輕貨重義金石
比貞公之才藻霞鬱雲蒸壯猶文武干將發矟
一麾出守再典專城歲星在吳拔薤保嬰弭節
分陝蓄德耀靈爲霖爲楫之翰之屏凡公賜履
露湛霜凝去思居富死祀生榮建牙在望荷衢
方亨公胡不待遽卽幽冥況復哲胤從公九京
彼蒼蒼者亦大膏肓翳公閎閎不朽汗青劍藏
浮彩蘭墮存馨箕裘未墜簪紱可承垂麻積慶
公已千齡惟某於公生死交情素車白馬末效

范卿一官羈紲次且屏營陳椒呼嗟涕泗交零
嗚呼哀哉尚饗

祭劉雲橋少宗伯

代

於乎大江派衍佳阜靈甄下滙梓溪代毓名賢
簪纓鵲起甲第蟬聯公也嗣武六翮高騫學窺
象罔理脫蹄筌經箱枕圃文質炳焉蚤通 朝
籍橐筆櫺軒書紬二酉牘奏千言鰲禁演綸虎
幄開編爲漢韋史爲唐許燕留雍振鐸模楷森
然度藹風春鑑朗月懸無斁譽髦式禮莫愆德

爲士范覺在民先乃副官尹乃叅 講筵駸駸

揆路華譽鬯宣公仍假沐養晦林泉急流勇退

鴻羽翩翩 帝睠舊人 命貳春官 徵書載

道曰北其轅二節以走胡車而船乞骸有疏邸

報猶慳豈其一疾溘爾上僊是耶非耶我心則

惓於乎公之器宇峙山渟淵公之操履白璧朱

絃遇事侃侃抵掌便便義所不可推之莫前

朝綱 國是需公仔肩庶徼大力浴日補天

聖主夢賚象求方占望諸爰立地切巖瞻公何

不待中道棄捐鉉掩流絕棟撓榱顛某等同升
詞苑席接櫪連式同桀黷和比箴堶承匱陪均
步武英躔引繩秉萬奉以周旋典刑未墜宗風
足傳今夕何夕廣柳西還慘我冠紳悲心孔纏
擬招噉爵公其鑒旃

祭何公露少叅發引

代

嗚呼維公之生白蛇入夢神骨清癯襟胸瀕洞
爲家名駒爲朝威鳳業並小王才埒大宋郎
潛二署秋部冬官爬搔剔蠹慮讞平反留曹多

暇巖游川觀白雲結社典擷墳繙玄風大暢文
譽蔚起東封之役疇爲禍始誤國倚奸肉食者
鄙公疏除戎以雪國恥稍遷臬憲于江于淞濺
澤露濃英暮電掣江則治郵甦民膏血淪乃備
兵正其淫褻扶義摧邪鋤強出厄狐豕潛踪萑
苻屏跡頽綱以張靡俗亦革賈狎市肆農安機
襖旬宣分陝尊君舊遊寬以劑猛不競不絀中
遭家難旋賦歸休菟裘十畝豹隱一丘冥鴻翩
翩弋人猶慕素絲何緇貝錦何妬鑑湖扁舟東

山杖屨埽軌杜關初服彌旦晚叅大道矢志薰
修埋齒掩骼專氣致柔石堅可付金丹可求胡
不百年一疾彌留嗚呼公之思采廊廟之器位
止藩臬壯猶未試公之尊生大齊之瑞花甲甫
週成然永寐公有賢父堂構垂於世司風紀聲
績流聞公有難弟接武機雲駢駢驄馬嶽嶽惠
文哲胤承家龍驤鳳舉力抗虎璫爲民扞禦就
徵檻車淹繫囹圄公納橐餗於女信處晚而生
還主恩如天一堂燕喜命酒開筵娛斑子舍

已幾十年達人知命公亦由然翳公孕靈惟神
惟嶽魂賓帝所徵在丹鶴鶴耶蛇耶妖祥誰卜
適去適來夢幻蕉鹿某從長君聯鑣仕籍夙跂
龍光無緣接席日月有期返于真宅不腆束芻
以薦靈魄嗚呼尚饗

祭贈比部郎黃公焚黃

有赫黃公學富材雄明經蚤歲貢鼓維鏞至文
弗耀大美弗庸晚充貢籍司敎黌宮都講嶽嶽
衿佩離離程道自南丁易已東飄然解組抗志

冥鴻課成令子蔚爲士宗盟狎跡虎業擅雕龍
樹有秋實享不于躬公旣大歸子乃顯融合鷄
譽重爽鳩望隆國有大慶錫類羣工寵公夫
婦袞綵褒崇秩視子官湛恩露濃寂寂佳城
頓迴鬱葱令長儒紳鼉鼓逢逢牛酒上塚驩譁
兒童某叨海鐸久跂遺踪恭逢覃典有賁其
封溪毛澗藻薄薦芹棕公今來假驟叱駕虹

祭姚封君

比部通所父也

駒生渥水蚌毓珠胎詎醴無源而芝無莖瞻彼

上洋黃龍浩森慶篤姚宗鳳毛矯矯問誰錫羨
日維封翁竅完渾噩樸韞鴻濛世競豪舉翁獨
攝謙世矜華綺翁獨守恬猗韋日波民鮮壽考
而翁黃髮永錫難老祝哽祝噎老苦中乾而翁
引年健履加餐聞翁質行玉潤春溫太丘穎川
龐公鹿門聞翁仁術肉骨起枯道殣需糜溝瘠
待蘇抱奇弗曜以啓次君家琛國寶立致青雲
兩試巖邑勞心撫字懽叶一同績騰三異循良
課最 璽書褒徵雲司擢雋粉署蜚英 帝嘉

乃勦邇彼義方峩冠象服紫綵輝煌寵公夫婦
齊眉白首娛綵稱觴遐不黃耇守相式廬乞言
惇史邦有元龜貴德尚齒人言後福山崇川增
期頤大耋以次而登濛汜奄迫風木興悲華摧
霽椿星隕少微次君聞訃繩管衰經啣哀 陛
辭淒風慘烈 彤墀新命曠典方瞻瑣臺虛左
乃寢之苦某叨海鐸獲登龍門更從比部復友
蘭孫世忝通家豈勝感盡不腆生芻表我心惻
侑以蕪詞擬步呼羗翁霽不昧來假洋洋

同官公奠封翰林檢討徐翁

太史子先父也

徭章日波民鮮長年而翁壽豈黃髮華顛祝哽
祝噎老苦中乾而翁矯矯健步加餐胡然而壽
胡然而矯德厚信在視民不窺問翁至性葛天
無懷竅完渾沌衷其猶孩問翁提躬素心質行
抱樸守雌與物無競義方訓嗣蔚爲時英九天
鸞鷟萬里鯢鯨乃冠北闥乃第南宮紉書金馬
授簡銅龍翁時迎養承歡子舍左右無方溫冬
清夏 帝嘉太史蜚聲庶常慶典推恩 紫誥

褒揚翁時拜 命眉壽亡害庶幾後祿川至未
艾胡嬰末疾而困膏肓太史驚悸一言數行嘗
藥延醫夙夜匪懈目不合睫衣不解絰翁何不
慙溘焉考終太史哭踊充充有窮 陛辭酸楚
痛結愁雲素旄南邁白日晝昏某等抗顏茲土
山斗是承賓翁虞庠視翁典刑況於太史世講
情殷聞訃傷悼有淚沾巾申椒畹蘭以佐湛醑
翁神行天庶其臨汝

又 代兩道

有赫南州高士標節慶篤上洋代挺英哲維翁
素樸履道慈躬耕畝食力纘穉之風穆穆古心
先民有逸渾沌竅完漢陰機息龍德而隱積善
亦世式穀象賢弓箕勿替四瑚八璉國寶家琛
片玉崑崗一枝桂林乃解北闥乃登上第中秘
紉書承明應制翁以子貴益惇至性循牆守雌
屏華去競太史迎養釋茲在茲怡顏愉色媚于
龐眉子舍承歡太和永固流水不腐戶樞不蠹
豈謂末疾遽困膏肓太史驚悸涕泣徬徨赤墀

新命曠典方瞻簪筆幾何卒寢之苦余等備兵
南紀久欽耆碩更嗟太史煢煢毀瘠素旄南來
靡因謳紉醺酒陳詞訴我伊鬱

祭陸丞

國有民模鄉有士式猗與先生人域是域膠序
名馳文戰屢北卒業成均終困京國乃謁銓曹
始分牧職人謂秩卑公則殫力疏剔效勤節愛
流澤水蘩自甘簋簋必飾道晴贊府庶無淹抑
奇服誨忌亨衢反塞飄然拂衣還我耕穡豈嚇

鼠腐而戀鷄肋鉅抱薄售位不配德乃成哲胤
風雲積臆化鯤搏鵬天池奮翼南宮高第計日
而得餘慶弓裘令聞何極況有蘭孫世其學殖
一試袞然觀光闡棘盈堵玉樹蘭芽岐嶷且膺
純嘏享有秋實胡窘二豎遽遽善息余等司鐸
海邦夙瞻儀則賓之虞庠固辭弗克豈謂彌留
慨然疾革輪奐方新於斯哭盡慶吊相隨爲我
心惻更嗟令子猶淹金勅嗚呼何艸不黃何日
不旻陳詞告公夜臺生色尚饗

祭史處士

代

紛錐刀之俗競兮夫孰爲之澄湔翳我公之蟬
蛻兮絀心計于棗研積鉅帙兮遺著盈千卹
窮收族兮里社流傳鳩桑燕翼兮堂構永綿種
玉秣蘭兮庭堦鬱芊旣息肩於苦海兮遂適志
于榆年悵鳳樓之寂寞兮陪燕子以留連獨樂
兮顏應駐忘憂兮鬢未宣隨杖屨兮閱歲月餌
靄丹兮欲九還胡赤日之難繫兮迅白駒其不
延厭屠酤之滿市兮駕鶴馭而上僊余辱昏於

季子兮邁冰玉之良緣詎嵒岬之見敘兮嗟藐
諸其誰憐幸而諸昆孝悌閔騫草塘二謝荆樹
三田念蓼莪之勞劬兮痛鵲鵲之在原庇葛藟
以同根兮培常鄂其韓翩紹爾世業遵厥遺言
武既讓弟憚恥越賢吹壎篪於旣翕兮篤門祚
之自天報卵翼於慈烏兮妥冥漠于九泉余忝
媼姪聞訃潛然胡以奠之魯酒荆筌嗚呼哀哉
尚饗

祭楊敬西處士

嗚呼哀哉自翁之辱與先君子游也而某始以父執父翁矣自翁仲子國穎之室吾妹也而某始以姻戚戚翁矣自某獲交翁之子恩及穎也世講滋益綢繆而耳翁之內行特稔矣翁之尊人曰西衢公中道見背遺丈夫子七長授書幼在襁而翁以中子拮据治生重息繫繭得其贏奉母兄驩庚割而授諸季男室女家事居送往還於翁乎倚辦卽蕭然垂橐弗顧也門內之食指千授衣授糈取若外藏人謂汜稚春之兒無常

父衣無常主翁殆有焉而翁之子曰恩曰穎並
韶秀而文穎復負雋諸生間庶幾其一日千里
以爲友于者之報而穎無祿矣恩猶困蓬累未
樹也翁以是悵悵憾而髮日加皤而神日加耗
某嘗一再登翁之堂察翁之眉宇淚汪淫而不
收言錯愕而失度則竊竊然憂之已而聞其豪
飲善飯狀則又適然喜曰其徼有天年而撫國
穎之遺孤而見二三子之林立而詎意其溘焉
長逝耶嗚呼玉樹朝摧霸椿夕折西河之曉未

乾南粵之魂空返子叩墜而顙天孫泣父而呼
祖豈門祚之中衰胡彼蒼之降鞠興言及此疇
不酸心矧某小子屬在通家感朋舊之彫零憫
吾甥之失怙其能母仰怵於天裁而俯悼乎人
理寫悽片言含哀一涕蓋以未定者付諸冥冥
之造物而以可必者望之振振之後人也嗚呼
哀哉尚饗

祭黃處士

代

以君之孝爲閔爲王甘毳惟腴滌瀝必良胡有

母尸雍而其養弗終以君之友如武如包訾割
其涼產取其礲胡二惠競爽而有傲象之謹囂
以君課子遷儒籛經種玉秬蘭蕙苗芝英胡樹
有秋實而弗及觀于厥成以君石交醪醇金利
管鮑謝信雷陳遜義胡烝也無戎中道而我遐
棄謂壽有徵而君豐下魁然其形謂靜得延而
君恬澹不艾其年何顏何蹠孰彭孰殤星輝日
晦鳬短鶴長吾其以問巫咸而愬諸昊蒼豈善
人之不穀抑尺幅之有常翳君齊年修短一視

真宰鑪錘鼠肝蟲臂有涯者生無涯者智天道
張弓責券如寄有子象賢俾豐而熾嗚呼惟其
縣矣是以長矣惟其熾矣是以昌矣吾儕何知
而哭吾私玉頽松折行道曰咨矧在金蘭附以
蘿絲生芻致殤宿草興悲呼山陽於一慟嗟冰
玉其疇依文縮意永景隔心疑嗚呼哀哉尚饗

祭姑夫陳朋淮

吁嗟嗟乎翁非先王父之愛婿而吾先君子夙
昔所嚴事者耶當王父之棄先君子于髫髻也

翁寔挈提擁護矻矻劬劬以先君子底于成先
君子喜俠而時託於酒人以自豪翁一至則投
轄浮觥促膝靡間其洵沫而歡洽也未嘗不稱
舅弟之雅也先君子卽世王母周孺人年八十
耄矣維翁安意怡志存遺造請無虛日無祿王
母以天年終某羈行役襄大事庀舍殮翁寔綱
紀之附身附棺必誠必信某是以得弛於皐鑒
是以得釋於終天之永憾蓋翁之勤施而爲德
於王父母若某父子蓋三世矣方藉翁以畢吾

先事聯屬吾子姓詎意翁逾耆而衰疾未浹旬而逝哭吾王母未幾旋復以哭王母者而哭翁也嗚呼翁能盡送終之禮於王母而某不能伸死生之訣於彌留翁能以愛王母者而波及某父子而某無能以父母之報而報翁也某尚得爲人乎哉謹披淚擗管而述其存亡骨肉之感如此若夫信義排紛孝友睦族有鄉之月旦與陳氏之家乘在茲不具贅聊以哭吾私云耳嗚呼哀哉尚饗

祭陳室趙孺人

嗚呼霞散綵於風前蘭摧芳於露下安仁之嘆
古今同悼豈孺人之淑惠而弗克終其壽考方
宸甫之失張孺人而徽音之嗣難也翩翩求凰
偃蹇者數矣凡再筮而始委禽焉曰之子也婉
嫕豈福人而不在貴族乎乃孺人笄而婦若習
爲婦笄而母若習爲母能使君子忘亡而跡不
駮於發笄字前子前子戀之無異張也友丘嫂
丘嫂驩之無異張也撫臧獲媵御臧獲媵御奉

之無異張也施及族姓戶外之賓交口譽之無
異張也僉曰是宜後張者食張之報其在夫人
胡女德則張梱政則張年顧不逮張而歿或先
之也宸甫是以有斷絃之悲其嚴慈亦切隕珠
之痛弱子呱呱攀號陟屺上自妯娒下逮閭里
亦咨嗟於造物之不仁而婉孌其未已矧余不
佞辱在世好申之以盟誓重之以婚姻令子弱
女竝屬齟齬能母悃悃兒女戀耶蓋先是孺人
疾亟余一再問起居歸以語家人家人徬徨走

而禱百神息女聞之色憂意若不自得者亡何
孺人之訃至家人涕泗交零息女則淚及於睫
矣嗟乎肺附之親發乎天性孩提之愛不學而
能況乎琴瑟之好鳴鳩之愛素所煦濡而卵翼
者乎宸甫燕婉之思諸子慈烏之慕蘋藻在筐
裘褐在笥瞻遺挂而憶梧捲者意孺人之音容
口澤優千秋其如存也吾儕小人又何於鳬鶴
乎較修短聊寫片斐以佐宸甫之鼓盆云耳嗚
呼哀哉尚饗

祭陸母張孺人

孝廉明楊母也

塗山一祠彤管千秋天開發曜懿德好述好述
伊何張姬陸婦昔爲令妻今爲壽母夔脂夜作
相夫下帷螢囊雪案家園不窺和丸斷杼教子
明經鷄窻萬字燈火五更逮乎中葉遭家不競
戮力助勲仔肩內政維時夫子集蓼茹荼夫人
佐之拮据枝梧處屯而亨遇蹇能夷旣章婦績
亦表母慈夫君祿仕贊府道晴餐水飲藥以贊
廉丞晚來偕隱白髮蕭蕭慶鍾令子逸翮凌霄

桂林一枝蘭孫蔚起鳳舉龍驤振振未已夫婦
諸老大齊可跨胡不憖遺浸假而化何日不旻
何艸不黃年望八表豈不壽康所嗟令子屢痛
蓼莪靡怙靡恃逢此輶軻三年讀禮再輟公車
副韋榆翟猶待鸞書余從哲胤夙瞻壺儀況友
文孫辱在襟期酌椒呼羗用抒哀臆不昧者霽
庶其來卽

祭誥封恭人顧母王太夫人發引

嗚呼天降甫申亦釐女士如圭儷璋以蘅和芷

僕僕恭人紛有內美異質鍾醇坤維隕祉作賓
亞中偕德齊齒展也婦師動遵女史于守于臬
百城是倚輿誦誰嗣戶歌樂只恭人佐之内外
和理樂我縞綦相彼釜錡四索得男振振麟趾
伯壻仲篴影纓接起顯允司成儒宗士軌無斁
譽髦以培豐芑朝課誦絃夕捧滫瀡仲亦省覲
堂開燕喜玉茂蘭芬幾百其指繞鄰稱觴母爲
加匕庶享期頤永綏福履胡然七袞加四而止
口澤如新機聲在耳日月有期歸于蒿里聚寶

新阡龜趺螭峙營魄永藏則百千祀某等承乏
南雍實步令子軫淑欽芳唁生哀死薄言酌之
蕕芹澗汜出祖紼謳敢告筵几尚饗

祭四姑

歲乙未冬十一月晦柯母黃碩人以疾終于寢
其兄子某姊子某弟子某某聞疾革扶服哕含
殮哭總帷並擗踊慟盡哀其臆之望乃能投淚
致誠函牲帛而爲文以告姑母碩人之霽嗚呼
姑母生卒乙未週甲子者一暮矣不可謂弗壽

有子三人孫男女十有六人長者克家幼者岐
嶷門內之治雍如斬如不可謂渺福而某昆弟
所爲悁悁恨恨不能釋憾於姑者五是以淚淋
淫不收而哭不絕聲夫姑三十而寡茹荼飲冰
坳齒無間固宜享有遐齡以安爲子者百年之
養而今已矣厓公憤憤尺幅謂何一憾也愛丁
於季者最深而季行役倚閭欲穿停雲靡極生
不逮養死不逮喪迨其屬纊而視不可含二憾
也昊天不吊十載之間喪我仲父長兄延我王

母胡猶不足而遽及余姑月骨碁功游遭荼毒
三憾也姑之母吾王母也老而孺慕兄吾父而
弟吾仲父也洵手足也子吾舅弟殷殷猶子某
昆弟未能共刀匕奉姑一日驩茲卽無解于心
欲報而不逮矣四憾也以姑之栢舟自矢如共
姜辛勤拮据昌阜故業如巴懷清婦熊丸荻灰
以諸孤底于成如柳仲郢母歐陽夫人 聖朝
褒旌年所及格而阨于田間湮坳弗耀卽某昆
弟猶守蓬簞之義亡能顯融而光大之五憾也

嗚呼其前四憾者旣脉脉不可追而後一憾者
章懿揚光猶有待乎後之人姑亦以是而舍咥
地下矣昔陳夫人柳氏以志屬其姪宗元曰子
恪而文將安子之爲也某於碩人有河東之誼
而情詞踟躕僅以其弗韻弗倫之言薦之筵几
慟不及文也姑而有知其將安子之爲也耶嗚
呼哀哉尚饗

祭蕭母夏太夫人

憶昔成均二三兄弟函席雖離班行濟濟曰維

比部雙白在堂承歡娛綵左右無方猗與太君
其儀不忒作嬪封翁齊年耦德大家逐子迎養
潘輿將母來諗旣樂只且背樹忘憂筵開燕喜
諧爾瑟琴憫子岵岵母也懷土扶侍西歸循咳
愛日永戀春暉母曰母然老婦恃粥畏此簡書
王程不宿肅肅鵠羽志樂離憂子之能仕我又
何求子遵母言脂牽南邁國爾忘家母心則快
令妻壽母偕老百年黃髮鯢齒出入比肩庶徼
帝釐生沾寵數胡不憇遺溘先朝露比部聞訃

擗踊盡哀一言一涕五內若隤昔也迎母母安
子養匪養之腴匕飭無恙今也哭母在天一涯
瞑不及訣危不及持天平母乎百身曷贖兒則
無良而禍母酷吾儕匍匐開譬百端母言在耳
母過悲酸矧母屬纊有而翁在周身周衣迄可
靡悔子有大孝善保子軀而翁念子重傷是虞
翳母令儀彤管可紀施及吾儕是履是跡薄言
酌之有釁夢辭髣髴環珮姍其來遲

祭朱母 太夫人

惟靈孕秀昭族兮儲祥 帝鄉亶金相而玉質
兮展蕙郁而蘭芳肆委禽於鼎閱兮爰結檜於
茂良若佩衡之和芷兮譬以圭而儷璋賁箴規
於鳬雁兮潔蘋藻之馨香嗣音徽於女史兮媿
淑懿於姬姜佐冰蘂於刺州兮蔚治行之孔揚
相錡金以母忌兮樂綦綰而未央旣壺政之肅
穆兮亦母訓之明章轂長離於丹穴兮璞照乘
於荆陽聯桂籍於南省兮掇璇魁於文昌握鑾
坡之斑管兮若蛟舞而鳳翔秉衡鑑於人倫兮

嚴袞鉞於縹緗惟 帝心之簡在兮策荷衢其
方亨乃將母以來諗兮每陟屺而懸情輟橫經
於東觀兮貳秩宗於陪京兼夷夔之禮樂兮勤
夙夜之寅清出問政於鳩部兮入稱觴於鯉庭
翻萊彩以朱紱兮弄孫飴於錦綳介眉壽於五
福兮極鼎養於三牲何璧月之沉曜兮暖寶婺
其翳明委雲衣而厭世兮紛鶴馭以來迎恨堂
護之朝悴兮撫栢棬而淚盈蓋猶結戀於永日
兮忘其花甲之再庚余輩辱交常伯兮同遙羽

而影纓景素舒之嫩暉兮望總帷而怔營亦知
古稀之逾邁兮況歿哀而生榮獨惜夫金之礪
而旱之霖兮方賚良弼以秉國成胡不憖遺一
母兮怛棘人之煢煢把瓊芳而莫致兮呼楚夢
以無聲敢攄哀於毫素兮用累德於旒旌

三忠祠告文

嗚呼湯武革命亦順天人夷齊扣馬迺有君臣
革除之際日月重新前徒旣倒後夫亦迍三公
矢志力扶乾坤勤王赴義致命成仁寧殉故主

甘作頑民其血已碧其名未湮六君慨慷從師
自閩生三義重遑恤一身留都俎豆一拂是鄰
清風忠節異代同倫某等粉榆晚進仰止後塵
春秋歲事薄薦藻蘋用表幽魄且勵矜紳神乎
如在鑒此明禋

祭俞母

代

於乎珠出滄淵璧產藍田物猶如此而矧名賢
天挺名賢鍾陵儲瑞豈子是祥翳母則類俞母
某姬蘭儀玉度體坤配乾方娥比嫠齊德夫子

宜其室家蘋蘩裡潔琴瑟靜嘉斷機勸學弋鴈
興規尸饗主饋無儀無非夫子不試以遺詒胤
國寶家珍懷瑜握瑾文林遶羽桂殿飛黃策名
上第用賓于王玠材傾都衡賦貴紙荷衢方亨
漸陸伊始問誰穀者翳母善誘爲畫荻歐爲和
九柳北堂有喜南陔猶慕陟屺瞻雲脉脉南顧
一疏終養烏烏私情菽水是歡旌鼎非榮母志
逾樂母壽彌康溫清定省左右無方八表含飴
大齊可跨胡不百年浸假而化於乎何旦不夜

何海不桑旣昌而熾亦壽而臧獨嗟冢君情深
愛日一命甫膺三釜未畢昔母初度同儕稱觴
冢君舞綵色笑洋洋今夕何夕倏悲風木哀感
路人戶咨巷哭而況同紳能無驚惻痛切一家
傷纏一國薄言酌之澗芷溪毛靈兮不昧鑒我
心慇

祭涂母邵太安人

同鄉公奠

俎俎碩人坤維隕祉秀毓璇閨教閑女史作嬪
名門好述君子如琮儷圭以衡和芷耦德偕隱

裘褐糟糠敬饁方冀賓案比梁柔滑滫瀡色養
尊章筥筐無怠珩珮有鏘宜其家人以雍以肅
施于宗黨維嫺維睦慶衍蘭芬祥鍾桂馥斷杼
和丸訓之式穀顯允伯子筮職輶軒四牡周咨
不宿 君言兩都司會歲閱推恩六珈三釜

天寵睠存陟屺有懷休沐將母舞綵娛斑酌以
大斗願賦循陔膝下相守躬曳扳輿手薦靈壽
母曰母然畏此 簡書 王事靡盬不遑啓居
老婦恃粥離憂可舒含飴佐餒旣樂只且春草

嚴程星軺于邁一節以趨在公匪懈料量惟平
程秭靡敗母神逾王母心則快言念辭母日月
幾何七箸亡恙慈顏有酤訃音突至或夢或吡
豈云義馭莫挽魯戈嗚呼人代滄桑何物不改
八袞加四亦旣壽豈屬續視含有兒孫在祔身
祔棺庶幾靡悔所嗟民部蒞事方新忽悲風木
樂樂棘人擗踊孺慕行道酸辛口澤雖遺容賤
誰親余輩誼忝粉榆有涕莫灑鄰應輟春里爲
罷社束芻芻詞臨風一寫靈螭蜚兮鑒此椒斚

祭王參知

代

嗚呼維師孕毓七澤三湘維師器宇嶽峙淵泓
維師藻思川湧雲行維師丰采電掣雷轟師起
丁年策足衢亨公車甫對袞然一鳴通籍容臺
邁羽陪京瑣垣持簡謇諤流聲靡邪不觸有鱗
必櫻奇服誨妬遠跡春明臬澳藩楚始握閩衡
引繩秉萬右行尊經人歸山斗士仰陶型鶚音
頓改蛾蛭斯成再參江政拔薤保嬰桑麻無恙
鷄犬不驚帝虛大燾方倚百城胡爲尺翳乃

點太清飄焉解組脫屣浮榮門無車馬社有
英爲鄉祭酒爲國老更三壽作朋百祿攸并云
何一疾脩爾夢楹頽山萎哲喪我典刑某才本
樗櫟質匪瑤瓊幸從鼓篋辱師題評期以國士
拔之孤生十年乃字師訓是程狗知感遇恩重
報輕秣陵承諱有淚沾纓燧已敢鑽草亦宿塋
築場負土莫踐初盟遙天展酹薄薦微誠哀師
九辯脉脉含情尚饗